

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 शुक्रवार

दिनांक 06.10.2023

प्रमुख समाचार –

1– भारत निर्वाचन आयोग ह पांच राज्य म अवइया विधानसभा चुनाव ल देखत रणनीति बनाये बर नई दिल्ली म आज पर्यवेक्षक मनके संग बइठका करीन ।

2– राज्य सरकार ह किसान मन बर चालू खरीफ विपणन बछर म प्रदेश के आने आने जिला म नवा धान उपार्जन केंद्र खोले के अनुमति दीन ।

अउ

3– कांकेर म आज होइस नगरीय निकाय अउ पंचायती राज महासम्मेलन –कांकेर जिला बर आठ सौ छियांसठ करोड़ रुपिया के विकास कार्य के लोकार्पण अउ भूमिपूजन करे गीस ।

.....

नर्वाचन आयोग बैठक

भारत निर्वाचन आयोग ह पांच राज्य मन म अवइया विधानसभा चुनाव सुचारू रूप ले कराये बर रणनीति तय करे के संबंध म नई दिल्ली

म आज अपन पर्यवेक्षक मनके संग बइठका करीन। मुख्य निर्वाचन आयुक्त राजीव कुमार अउ चुनाव आयुक्त अनूपचंद्र पांडेय अउ अरुण गोयल ह सामान्य, पुलिस अउ व्यय पर्यवेक्षक मन संग विचार विमर्श करीन। ए पर्यवेक्षक चुनाव के दौरान चुनावी प्रक्रिया के निगरानी बर महत्वपूर्ण भूमिका निभाथे। बतादन कि ए बछर छत्तीसगढ़ समेत राजस्थान, मध्यप्रदेश, तेलंगाना अउ मिजोरम म विधानसभा चुनाव होवइया हे।

संवाददाता कार्यशाला

आकाशवाणी के अंशकालिक संवाददाता मनके जोनल कार्यशाला आज हैदराबाद म आयोजित करे गीस। ए कार्यशाला म छत्तीसगढ़, मध्यप्रदेश अउ तेलंगाना के संवाददाता मन भाग लीन। कार्यशाला के शुभारंभ आकाशवाणी के प्रधान महानिदेशक डॉक्टर वसुधा गुप्ता ह करीन। ओमन कीहिन कि अवइया विधानसभा चुनाव के दौरान आकाशवाणी के जम्मा संवाददाता आकाशवाणी के परंपरा अनुसार संतुलित, निष्पक्ष अउ प्रामाणिक कवरेज करंय।

ओमन कीहिन कि देशभर म आकाशवाणी ह खबर के विश्वसनीयता बर जाने जाथे। डॉक्टर वसुधा गुप्ता ह कहिन कि आकाशवाणी मूलरूप ले रेडियो माध्यम होय के संगेसंग आने आने सोशल मीडिया के प्लेटफार्म म घलो सक्रिय हे। ए मउका म आकाशवाणी के छत्तीसगढ़, आंध्रप्रदेश अउ तेलंगाना के कार्यक्रम प्रमुख, समाचार प्रमुख अउ कार्यक्रम अधिशासी समन्वय घलो मौजूद रीहिन।

पंचायती राज महासम्मेलन

कांकेर म आज नगरीय निकाय अउ पंचायती राज महासम्मेलन के आयोजन करे गीस। ए मउका म कांग्रेस के राष्ट्रीय महासचिव प्रियंका गांधी अउ मुख्यमंत्री भूपेश बघेल ह कांकेर जिला बर आठ सौ छियांसठ करोड़ रूपिया के आने आने विकास कार्य के लोकार्पण अउ भूमिपूजन करीन। उंहे ओमन पांच युवक मन ल रोजगार प्रमाण पत्र दीन। एखरे संग पुरखती कागजात अउ तानाबाना पुस्तिका के विमोचन घलो करीन।

कार्यक्रम ल संबोधित करत प्रियंका गांधी ह कहिन कि एक समय म छोटे-छोटे काम बर दिल्ली या रायपुर जाय बर पड़य । लेकिन पंचायती राज लागू होय के बाद लोकतंत्र गांव तक पहुंचे हे। ओमन कहिन कि एखर ले ए फायदा होइस कि गांव के विकास बर गांव के प्रतिनिधि ही निर्णय कर पावत हे ।श्रीमती गांधी ह प्रदेश सरकार डहार ले चलाये जावत आने आने योजना के उल्लेख करत कहिन कि ए योजना मनके सेती आज पूरा देश म छत्तीसगढ़ के विशेष पहिचान बन गेहे।

कार्यक्रम ल संबोधित करत मुख्यमंत्री ह राज्य पावर कंपनी म एक अप्रैल दू हजार चार अउ ओखर बाद नियुक्त लगभग दस हजार कर्मी मन बर नवीन अंशदायी पेंशन योजना के जगा पुराना पेंशन लागू करे के घोषणा करीन। उंहे मुख्यमंत्री ह पुलिस उप निरीक्षक के पद म पदोन्नति अब तैंतीस प्रतिशत ले बढ़ाके चालीस प्रतिशत करे के एलान करीन। संघरा मुख्यमंत्री ह कृषि महाविद्यालय पखांजूर के नाव पूर्व प्रधानमंत्री स्वर्गीय इंदिरा गांधी के नाव उपर करे के घोषणा करीन। उंहे ओमन कहिन कि हल्बी, गोंड़ी, सरगुजिहा, भतरा जइसे स्थानीय बोली म पढ़ाई

कराय जाही, जेखर बर ए भाखा मनके शिक्षक के नियुक्ति घलो करे जाही।

बस्तर—देवगुड़ी—मातागुड़ी—लिपिबद्ध

बस्तर क्षेत्र आदिवासी विकास प्राधिकरण डहार ले देवगुड़ी अउ मातागुड़ी मन ल संरक्षित अउ संवर्धित करे के दिशा म विशेष पहल करत एमन के जीर्णोद्धार करे के संगेसंग ओमन ल संवारे के प्रयास करे जात हे । एखर तहत देवगुड़ी अउ मातागुड़ी मन ल लिपिबद्ध करे जात हे। उंहे तीन हजार चार सौ ले जादा के देवगुड़ी अउ मातागुड़ी मन ल सामुदायिक वनाधिकार प्रदान करे गेहे। एखर अलावा छै हजार चार सौ ले जादा एकड़ के भूमि देवगुड़ी अउ मातागुड़ी के नाव ले संरक्षित करे गेहे। ए धरोहर के संरक्षण अउ संवर्धन बर स्थानीय जनजातीय समुदाय के सहभागिता सुनिश्चित घलो करे जात हे।

उंहे बस्तर विभाग के गोंड, हल्बा, भतरा, धुरवा, मुंडा, मुरिया अउ कोया जइसे प्रमुख आदिवासी समुदाय के लोगन मनके जीवन म प्रचलित सांस्कृतिक रीति—रिवाज, संस्कार, परंपरा अउ मान्यता म आधारित सामाजिक तानाबाना नामके पुस्तिका घलो प्रकाशित करे जात हे। एखरे संग बस्तर के वीर सपूत अउ वीरांगना मनके प्रतिमा के स्थापना घलो करे जात हे।

आवास ऋण अनुदान

राज्य सरकार के जनसंपर्क विभाग ह श्री ललित सुरजन संचार प्रतिनिधि आवास ऋण ब्याज अनुदान योजना बर पत्रकार मनले आवेदन लेना शुरू कर देहे। योजना के अंतर्गत तीस लाख रूपिया तक के आवास ऋण बर पांच प्रतिशत प्रतिमाह ब्याज अनुदान पांच साल तक दे जाही। ए योजना एक अप्रैल दू हजार तेईस के बाद ले खरीदे गे मकान म लागू होही। योजना के लाभ केवल आवासीय ऋण म दे जाही अउ खरीदे वाला मकान छत्तीसगढ़ राज्य के भीतर होना चाही।

नवीन धान खरीदी केंद्र

राज्य सरकार ह किसान मनके सुविधा ल ध्यान म राखत खरीफ विपणन बछर बर प्रदेश के आने आने जिला मन म नवा धान उपार्जन केंद्र खोले के अनुमति प्रदान करे हे। ए संबंध म खाद्य विभाग ह आदेश जारी कर देहे। जारी आदेश के अनुसार राजनांदगांव जिला के देवकट्टा अउ संबलपुर म नवीन धान उपार्जन केंद्र खोले जाही। उंहे सक्ती जिला के नंदौरखुर्द, महासमुंद के बोडराबांधा अउ आमगांव, मुंगेली के औराबांधा, बलरामपुर के डूमनपान म नवा धान उपार्जन केंद्र के स्वीकृति दे गेहे।

अइसने कौंडागांव जिला के बड़े ओड़गांव, कुएमारी अउ नवागांव, गरियाबंद जिला के पीपरछेड़ी अउ कांकेर जिला के बंडापाल अउ बेलगाल म नवा धान उपार्जन केंद्र खोले जाही। एखरे संग मोहला—मानपुर—अंबागढ़ चौकी जिला के मुरारगोटा, बीजापुर जिला के चेरपाल, खैरागढ़—छुईखदान—गंडई जिला के टेलकाडीह, दंतेवाड़ा जिला

के बड़ेगोडरे अउ अरनपुर, रायगढ़ जिला के बटुराकछार, कटाईपाली सी., सरगुजा जिला के बोदा, मंगारी अउ बेलजोरा म नवा धान उपार्जन केंद्र खोले जाय के अनुमति दे गेहे।

पंचायत सचिव वेतनमान

पंचायत अउ ग्रामीण विकास विभाग डहार ले ग्राम पंचायत सचिव मन ल संशोधित वेतन संरचना अउ दूसर सुविधा मनके स्वीकृति के संबंध म आदेश जारी कर दे गेहे। राज्य शासन कोति ले प्रदेश के ग्राम पंचायत म कार्यरत ग्राम पंचायत सचिव मनके स्वीकृत वेतनमान के संबंध म पंद्रह साल ले कम सेवा अवधि वाले ग्राम पंचायत सचिव मन ल तीन हजार पांच सौ ले दस हजार रूपिया अउ ग्यारा सौ ग्रेड वेतन के संग चार हजार रूपिया विशेष भत्ता दे जाही।

उंहे पंद्रह साल ले जादा सेवा अवधि वाले ग्राम पंचायत सचिव मन ल पांच हजार दू सौ ले बीस हजार दू सौ रूपिया अउ चौबीस सौ ग्रेड वेतन के संग तीन हजार रूपिया विशेष भत्ता दे जाही। एखरे संग ग्राम पंचायत सचिव मन ल प्रतिवर्ष पच्चीस दिन अर्जित अवकाश अउ बारा दिन आकस्मिक अवकाश के पात्रता रीही। ये आदेश एक अक्टूबर ले लागू होंगे हे।

आईईडी बरामद

सुकमा जिला म सुरक्षा बल ह दू ठिन आईईडी बरामद करे हे । मिले जानकारी अनुसार बड़ेसेट्टी अउ चिंतलनार कैप ले डिस्ट्रिक्ट रिजर्व गार्ड—डीआरजी बस्तर फाईटर्स अउ जिला पुलिस बल के जवान सर्चिंग अभियान बर निकले रीहिन । इही दउरान बगड़ेगुड़ा अउ इत्तापारा करा माओवादी मन डहार ले सुरक्षा बल ल नुकसान पहुंचाय के इरादा ले लगाय गे दू ठिन आईईडी बरामद करे गीस, जेला बम निरोधक दस्ता ह मउकाच म नष्ट कर दीस ।

बातों—बातों—में

सुनइया मन ल बतादन कि प्रादेशिक समाचार एकांश डहार ले समसामयिक विषय म आधारित साप्ताहिक कार्यक्रम “बातों—बातों—में” ए बखत पीएम विश्वकर्मा योजना उपर सूक्ष्म लघु अउ मध्यम उद्यम एमएसएमई रायपुर के संयुक्त निदेशक राजीव एस. नायर ले लेगे भेंटवार्ता प्रसारित करे जाही । एखर प्रसारण आकाशवाणी के रायपुर केन्द्र डहार ले काली सात अक्टूबर के बिहनिया साढ़े दस बजे ले करे जाही । एला छत्तीसगढ़ के जम्मा आकाशवाणी केन्द्र एके संगरा रिले करही ।
